

# Panjangkan tempoh moratorium - Pakar

Oleh SITI AISHAH YUSOFF

pengarang@utusan.com.my

■ KUALA LUMPUR 12 JAN.

**T**EMPOH moratorium atau arahan menghentikan sementara aktiviti perlombongan bauksit di Kuantan, Pahang selama tiga bulan perlu dipanjangkan bagi memastikan masalah berbangkit dapat ditangani dengan sebaik-baiknya.

Pengarah Institut Kajian Perladangan, Universiti Putra Malaysia (UPM), Prof. Dr. Khanif Yusop berkata, tempoh yang lebih lama diperlukan bagi mengesan setiap penyelewengan dan pencemaran yang diakibatkan oleh aktiviti tersebut.

"Dalam waktu moratorium, sebarang aktiviti penguatkuasaan undang-undang dapat disusun supaya penyelewengan, rasuah, penipuan dan pencemaran dapat dihentikan.

"Sekurang-kurangnya tempoh setahun moratorium perlu dilakukan bagi menentukan penguatkuasaan serta pengubahsuaian peraturan dapat dilaksanakan. Sekiranya peraturan sekarang tidak cukup untuk membendung masalah yang dihadapi, maka peraturan baharu perlu diwujudkan," katanya ketika dihubungi *Utusan Malaysia* di sini.

*Utusan Malaysia* hari ini melaporkan polis dan beberapa agensi lain menjalankan operasi penguatkuasaan perlombongan bauksit



**Sekurang-kurangnya tempoh setahun moratorium perlu dilakukan bagi menentukan penguatkuasaan serta pengubahsuaian peraturan dapat dilaksanakan."**

**KHANIF YUSOP**

Pengarah Institut Kajian Perladangan, Universiti Putra Malaysia

secara bersepadu selama 24 jam sehari dengan sembilan pusat pemeriksaan bermula Sabtu lalu.

Operasi fasa pertama sejak 9 hingga 14 Januari ini bagi memastikan hanya lori muatan bauksit yang mengikut peraturan dan syarat permit dibenarkan membawa muatan ke Pelabuhan Kuantan.

Bagi fasa kedua iaitu bermula 15 Januari hingga 15 April pula, penguatkuasaan adalah bagi menentukan semua kegiatan perlombongan dan pengangkutan bauksit di daerah Kuantan dihentikan sepenuhnya.

Khanif turut mencadangkan

agar kerajaan mewujudkan kajian analisis kos dan manfaat terhadap aktiviti perlombongan dalam jangka masa panjang.


"Kajian ini akan menentukan untung dan rugi aktiviti tersebut termasuk kepada kesan jangka masa panjang, pencemaran alam sekitar, pemusnahan biodiversiti dan sumber alam semula jadi.

"Pihak yang melombong bauksit juga perlu dikenakan cukai yang boleh digunakan bagi memulihkan kawasan dan membayar ganti rugi kepada kumpulan rakyat yang terlibat," katanya.

Dalam pada itu, Ketua Kluster Sumber Asli dan Alam Sekitar, Majlis Profesor Negara (MPN), Prof. Emeritus Datuk Dr. Ibrahim Kamoo berkata, isu utama melibatkan pencemaran alam sekitar serta kesan kepada kehidupan penduduk sekitar perlu diselesaikan terlebih dahulu sebelum menetapkan sesuatu tempoh moratorium terhadap aktiviti perlombongan bauksit.

"Moratorium ini perlu dilakukan secara berperingkat-peringkat dengan melihat kepada semua isu yang berkaitan dengan alam sekitar seperti pencemaran dan kesan kepada masyarakat setempat.

"Jika tiga bulan tidak mencukupi untuk menyelesaikan masalah itu, tempoh tersebut perlu dipanjangkan sehingga ia selesai supaya aktiviti perlombongan bauksit dapat diteruskan dengan berkesan," katanya.



**KAWASAN** perlombongan bauksit di Felda Bukit Goh, Kuantan dicadangkan supaya ditutup selama sekurang-kurangnya setahun bagi mengatasi semua masalah berbangkit dengan sebaik-baiknya. - UTUSAN/AHMAD ZAKKI JILAN